



Inatsisartut suleriaasianni § 36 imm. 2 naapertorlugu Naalakkersuisunut apeqqut imaattoq matumuuna saqqummiuppara:

**Naalakkersuisunut apeqqut: Takornariartaassuit nunatta imartaanni iluliarsuit akornatigoortillutik isumannaatsumik angalasarnissaat anguniarlugu maleruagassanik Naalakkersuisut pilersitsiniarnerannui suliaq sumut killippa?**  
(Inatsisartunut ilaasortaqaq Aleqa Hammond, Siumut)

**Tunnqavilersuut:**

Nunatta aningaasaqarnerani takornarissat pingaaruteqarluinnarput qularutigineqassanngilarlu nunatta ukiuni aggersuni takornariaqarnikkut soqutigineqarnera annikilliarternaviannngitsoq.

Takornarissat nunatsinni toqqissisimallutik nunatta pinnissusaanik misigisaqarnissaat tamatta soqutigisaraarput nammineerlutik angalasuugaluarpata, takornariartaassuarnik angalasuugaluarpata aqqissugaasumilluunniit angallanneqartuugaluarpata.

Takornariartaassuit ukiuni kingullerni nunatta imartaanni angallattut amerliartupiloorput, tamannalu aningaasaqarniarnitsinnut annertuumik iluaqutaavoq.

Taamaattoq oqaatigisariaqartoq aarlerinartoq tassaavoq avannaani iluliarsuit angisuut qaninaarpallaarlugit ingerlaartarnerat illersorneqarsinnaanngitsoq maannakkut atuummat. Iluliarsuit aserorlutik takornariartaassuit imaaliallaannaq suujunnaarsissinaavaat qimaariarfissaqanngiusartukkut iluliarsuarnut qattaarpallaarnikkut ingerlaartoqartarmat. Tamannalu ajutoornersuamik kinguneqariaannaavoq.

Kangilinnguit sakkutooqarfianit aarlerisaarutigineqareerpoq takornariartaassuit ikkarlinnerisigut imaluunniit iluliarsuit qanippallaarlugit ingerlaartarneratigut aserorfigineqarnikkut ajutoornersuarmik pisoqarsinnaasoq, aamma nalunaarutigineqarpoq sukannersunik maleruagassiorortoqanngippat taamaattoqarsinnaaginnarani qaqugu ajutoornersuarmik pisoqarnissaa kisimi apeqqutaasoq.

Tamanna ilisimatillugu sapinngisamik ajutoornersuarmik pisoqannginnissaa pinaveersimatinniartariaqarparput. Umiarsuit ilisimasortaqaqartarnissaannik piumasaqaateqarfigineqartarnerat naammangilaq, misilittakkat takutimmassuk iluliarsuit qanoq qanitsiginissaannik maleruagassiortoqarsimatinnagu umiarsuit aquttuisa namminneq aalajangersinnaagaat qanoq iluliarsuit qanitsigisumik ingerlaarnermini sanequnniarnerlugit.

Takornariartaassuit arlaat ajutoorujussuassagaluarpataq nunatta toqqissisimananngitsumik maleruagassiorfigineqarsimanngitsumillu tusaamaneqaatigilertussaavaa.

International Maritime Organization suleqatigalugu nunatta imartaanni pissusilersornissamut maleruagassiornikkut nunat tamat akornanni malinneqartussanngortumik aalajangersagaliornikkut toqqissisimanartumik takornariartaassuit angallattalernissaat anguneqassaaq, tamannalu Siumumit siunnersuusiornikkut piviusunngortinneqarnissaa pingaartipparput.

Neriuppugut Inatsisartut takornariartaassuit toqqisimanartumik imartatsinni ingerlaartarnissaannik aqutissiuusseqataanissamut paasinnilluarlutik suliumaartut takornariaatitta nunatsinnilu innuttaasut toqqissisimalutik misigisaqarnissaat angujumallugu.